

DISSIDIUM

ANGLICANVM

De

PRIMATV

REGIS,

CVM BREVI PRÆ-  
*fatione ad Catholicos in An-  
 glia degentes.*

AVTHORE,

MARTINO BECANO SO-  
 cietatis I E S V Theologo & Pro-  
 fessore ordinario.



MOGVNTIÆ

Ex officina typographica Ioannis Albini.

*Anno M. DCXII.*

ANNO DOMINI

PRIMA

1812

CLM DE RE-ET FOR

Reverendissimi  
Clerici

ET HOC

REVERENDISSIMO

Reverendissimo



REVERENDISSIMO

Reverendissimo

REVERENDISSIMO



# PRÆFATIO

AD

Catholicos in Angliâ.

**S** Aluete Illustris-  
 simi Domini,  
 inuictissimi Ath-  
 leta. Ad vos ve-  
 nio, interpellandi causâ. Si  
 molestum non est, audite me  
 paucis, non diu vos tenebo:  
 Ante biennium scripsi duos  
 libellos de Primatu Regio: al-  
 terum contra Apologiam &  
 Monitoriam Præfationem.

A 2 Sere.

# 4 PRÆFATIO.

*Serenissimi & Potentissimi  
Jacobi, Magnæ Britannia  
Regis: alterum contra Tor-  
turam Torti, seu, contra Sa-  
cellanum Regis. Agré hoc  
tulerunt Academici vestri;  
& confestim, in causa Regia,  
bellum mihi indixerunt. Hi  
præsertim, Guilielmus Too-  
ker, Richardus Thomsonius,  
Robertus Burhillus, Henri-  
cus Salcolbrigiensis. Nec de-  
fugio. Quin multa sunt, qua  
me reddant alacriorem. Pri-  
mum, causæ aequitas. Tum,  
vestra fides, & constantia.  
Denique, Aduersariorum  
inter se dissidia, & intestina  
dissen-*

*diffensiones. De causa, quam  
defensurus sum, equitate,  
quid attinet dicere? Pugna-  
turus sum pro Ecclesia Chri-  
sti, pro honore & obedientia  
Præfulum, pro Maiorum ex-  
emplo & consuetudine. Et  
hic, quenquam extimescam?  
Jam, vestra fides & constan-  
tia, quam quotidiani carce-  
res, vincula, supplicia, mortes  
pro Christo obita, toti orbi te-  
statisimam faciunt, cui tor-  
porem non excutiat? cui cal-  
car & animum non addat?  
Verè de vobis usurpare pos-  
sum illud ex Apostolo: Spec-  
taculum facti estis. D E O,*


## 6 PRÆFATIO.

Angelis & hominibus. Deo,  
 qui intuetur vestra certamina;  
 qui vires suppeditat ad  
 victoriam, & coronā preparat  
 ad triumphum. Angelis,  
 qui mirantur, vos in carne  
 fragili, potentissimos inferorū  
 Principatus non formidare:  
 & simul gaudent, tam gloriosos  
 pugiles, sua custodia commissos  
 esse. Hominibus, qui toto orbe  
 diffusi, vestro exemplo, vestra  
 virtute & patientia, ad similia  
 certamina, pro Christo subeunda,  
 vehemēter accenduntur. Porro, dissidia  
 aduersariorum inter se tanta  
 sunt, tamq̃ distracta ac dissipata

*pata eorum vires, ut magnopere metuendos esse non putem. Si nescitis, hunc libellum vobis offero dedicoq; in quo, quibus in capitibus ipsi dissentiant, sigillatim explicatū est. Eum, si vacat, legite, & bene de euentu sperate. Interea ad pugnam me parabo; & cū tempus aduenerit, Spectatores vos esse cupio. Valete, & meam interpellationem aequiborūq; consulite. Moguntia, mense Nouembri, anno 1611.*

Vestri amantissimus

Martinus Becanus.



DISSIDIVM ANGLI-  
CANVM,

*De*

PRIMATV  
REGIO.



PRIMATVS REGIVS  
in Ecclesia Anglicana,  
res noua est. Ortum ha-  
buit sub Henrico Octa-  
uo : floruit sub Edouardo Sexto &  
Elisabetha : nunc, sub Iacobo, tot  
dissidijs domesticis laceratur & dis-  
cerpitur, vt diu stare non possit. Re-  
ctè Christus in Euangelio : *Omne re-  
guum in se diuisum desolabitur.* Porro,  
quæ & quanta sint illa dissidia, in  
his paucis Quæstionibus demon-  
strandum est :

*I. An*



- I. *An Rex Angliæ habeat aliquem Primatum in Ecclesia?*
- II. *An primatus ille sit Ecclesiasticus & spiritualis?*
- III. *An Rex ab eo Primatu possit vocari Primas Ecclesiæ?*
- IV. *An ab eodem vocari possit supremum caput Ecclesiæ?*
- V. *An primatus ille consistat in aliqua potestate vel iurisdictione Ecclesiastica?*
- VI. *An Rex, ratione sui Primatus possit indicare Conci-*

*Concilia, & in iis pra-  
sidere?*

*VII. An possit leges ecclesia-  
sticas condere?*

*VIII. An beneficia ecclesiasti-  
ca conferre?*

*IX. An Episcopos creare &  
deponere?*

*X. An contumaces excom-  
municare?*

*XI. An iudicem controuer-  
siarum agere?*


*XII. Vnde Rex habeat su-  
um Primatum?*

*XIII. An subditos possit coge-  
re ad iuramentum  
Primatus?*

In his Quaestionibus extremè  
dissentiant Aduersarii. Sunt autem  
hi ferè

hi ferè. Sacellanus in *Tortura Torti*,  
Guilielmus Tooker Decanus Li-  
cheteldensis in *Duello*, seu *singulari*  
*certamine cum Martino Becano*. Rich-  
ardus Thomsonius in *Elencho Refu-*  
*tationis Tortura Torti*. Robertus  
Burhillus in *Responsione pro Tortura*  
*Torti*. Henricus Salcolbigiensis in  
*Refutatione Examinis Becanici*. Præ-  
ter hos citabo etiam Nicolaum San-  
derum de *Schismate Anglicano*, Ge-  
nebrardum in *Chronologia*. Polydo-  
rum Virgilium in *Historia Anglicana*,  
Iacobum Augustum Thuanum in  
*Libris Historiarum sui temporis*. Cal-  
u num in *Commentario supra Pro-*  
*phetam Amos*. Et si qui  
alii sint.





## I. QVÆSTIO.

*An Rex Anglia habeat aliquem primatum in Ecclesia.*

I. **P**rimum dissidium est de nomine *Primatus*. Pleriq; admittunt hoc nomen. At Richardus Thomsonius malit *Suprematum*, quàm *Primatum* appellare. Ratio ipsius est, quia *Primatus* significat potestatem eiusdem ordinis: at Rex in Ecclesia Anglicana non habet potestatem eiusdem ordinis cum Episcopis & Pastoribus, sed altioris ac diuersi ordinis. Ergo non habet *Primatum*, sed *Suprematum*. Verba Thomsonii, pag. 33. sunt hæc: *Nos in Anglico nostro idiomate belliores longè sumus, quàm per inopiam Latini sermonis nobis Latine esse licuit. Non enim dicimus, The Kings Primacie, Regis Primatum, sed, The Kings Supremacie, Regis Suprematum. Quo vocabulo nos quoque deinceps utemur. Multum enim differunt Primatus & Suprematus. Illud enim potestatem eiusdem*

*eiusdem ordinis videtur significare, hoc non item.*

II. Hinc duo colligimus. Vnum est, omnes Anglos, qui vtuntur nomine Primatus, vel errare, vel improprie loqui, si Thomsonio credimus. Nam si proprie loquuntur, cum Primatus proprie significet potestatem eiusdem ordinis, planè sentiunt, Regem habere potestatem eiusdem ordinis cum Episcopis & Prelatis Ecclesiæ. At hic, iuxta Thomsonium, error est. Vel igitur errant, vel improprie loquuntur.

III. Alterum est, de re significata coniecturam sumi posse ex voce significante. Vox *Suprematus*, noua & nuper inuenta est; incognita antiquis Patribus; inusitata in Scripturis; orbi Christiano inaudita. Quid porro significat? Supremam potestatem Regis in Ecclesia. Et hæc igitur noua est. Sanè, si antiqui Patres, tam Latini, quàm Græci, agnouissent hanc potestatem, reperissent aliquod saltem vocabulum, quo eam proprie expressissent. Id verò à nunc factum est.





## II. QVÆSTIO.

*An Primatus ille, quem Rex  
habet in Ecclesia, sit Ec-  
clesiasticus & spiri-  
tualis?*

I. **H**Oc alterum dissidium est. Sub Henrico & Edouardo, semper appellatus est Primatus Ecclesiasticus & spiritualis, vt patet ex Sanderō, qui sic habet: *Caluinus Henrici Primatum Ecclesiasticum oppugnauit.* Item; *Episcopus Rossensis, quod Henrici Primatum Ecclesiasticum nollet confiteri, ad mortem producit.* Item; *Multi in custodiis propter negatum Ecclesiasticum Regis Primatum detenti.* Item: *Henricus mandauit, vt filius in fide Catholica educaretur, excepto Primatus Ecclesiastici titulo, quem ei reliquit.* Item: *Stephanus Vintonensis, Edmundus Londinensis, Cuthbertus Dunelmensis, Niclaus Vigorniensis, & Dainus Cicestrensis Episcopi, timide resistenter pueri Regis Primati spiritali; imò simpliciter subscripserunt.*

II. Sub

II. Sub Maria, quæ Edouardo fratri successit, sublatus est hic titulus in Comitibus Londinensibus, ut testatur Iacobus Thuanus libro 9. historiarum sui temporis, his verbis: *Antiquatus iisdem Comitibus, Primatus Ecclesiastici titulus.* At sub Elisabetha iterum restitutus est, ut refert idem author libro 15.

III. Hoc tempore, sub Iacobo, in controuersiam vocatur. Aliqui non audent appellare Primatum Ecclesiasticum & spiritalem, sed, Primatum quoad ecclesiastica & spiritalia. Inter quos est Sacellanus Regis in Tortura Torti, pag. 90. ubi sic habet: *Neque verò, quoad spiritalia, alium nos Regi Primatum tribuimus, neque quoad temporalia alium Pontifici detrahimus, quam debemus. Prior ille Regibus omni iure; posterior hic Pontifici, nullo iure debetur.* Ego, cum primum legerem hæc verba Sacellani, putabam illum pro eodem usurpare hæc duo, *Primatus spiritalis, & Primatus quoad spiritalia.* Et similiter hæc duo, *Primatus temporalis, &, Primatus quoad temporalia.* At defensores & interpretes Sacellani, Thomsonius & Burhillus, aliter sentiunt. Sic enim de hac re scribit Burhillus, pag. 55. *Non dicit (Sacellanus) Primatum spiritualem, sed Primatum quoad spiritalia, deberi Regibus omni*

1476.

iure. Et pag. 133. in fine: *Et si enim Regi tribuimus Primatum in Ecclesiam, non tamen Primatum spiritualem aut ecclesiasticum ei tribuimus, sed potius Primatum quoad res & personas spirituales & ecclesiasticas.* Et Thomsonius, pag. 31. *Non dixit (Sacellanus) Primatum ecclesiasticum aut spiritualem, quasi formaliter intelligat; sed quoad spiritualia, id est, obiectivè & materialiter.* Quo sensu idem author, pag. 95. ait: *Diximus Regem gubernare quidem Ecclesiastica, sed non Ecclesiasticè.*

IV. Igitur, si quæras in Anglia, an Rex habeat Primatum Ecclesiasticum, nec ne? Respondebitur hoc modo: Henricus, Edouardus & Elisabetha habuerunt Primatum Ecclesiasticum; Iacobus non habet Ecclesiasticum, sed solum, quoad Ecclesiastica. Ergone minus hic habet, quàm illi habuerunt? Sic apparet. Ergone tam brevi interuallo accisus & imminutus est Primatus Regis in Anglia? Ita aiunt. Ergone prope interitum est? Non dubito. Quid causæ? Audi ex triuio: *Quod citò fit, citò perit.* Audi ex sacro Codice: *Si est ex hominibus consilium hoc aut opus, dissoluetur, Actor.*

5.30.

III. QVÆ-





## III. QVÆSTIO.

*An Rex ab hoc Primatu possit vocari Primas Ecclesie?*

I. **H**enricus Salcolbrigienſis ſimpliciter affirmat. Sic enim ſcribit pag. 140. *Dico Regem Angliæ, Eccleſiæ Anglicanæ Primatem eſſe.* Imò, tam certum ac indubitatum hoc eſſe vult, vt putet peccare contra publicam profeſſionem Anglicanam, qui id neget. Nam pag. 177. ſic habet: *Angliæ Regem, Anglicanæ Eccleſiæ Primatem eſſe, in profeſſione publica Anglicana veritatis ſacris literis nixæ ponitur.*

II. Tookerus & Burhillus ſimpliciter negant. Sic enim habet Tookerus pag. 3. *Olere autem malitiam, ac clamitare audaciam tuam illud videtur, cum Regem Caput Eccleſiæ Primatemq; conſingas.* Et Burhillus pag. 133. *Nec Primatem quidem omnino Regem noſtrum dicimus; multò verò minùs Primatem Eccleſiaſticum.*

III. Hinc formo duplex argumentum:

B

Alte-

Alterum ex Tookero, in hunc modum; Qui dicit, Regem esse Primate[m] Ecclesiæ, audax & malitiosus est. At Henricus Salcolbrigien[sis] dicit, Regem esse Primate[m] Ecclesiæ. Ergo audax & malitiosus est. Alterum ex Henrico, hoc modo: Qui negat, Regem esse Primate[m] Ecclesiæ, peccat contra publicam professionem veritatis in Anglia receptæ. At Tookerus negat Regem esse Primate[m] Ecclesiæ. Ergo peccat contra publicam professionem veritatis in Anglia receptæ. Nimirum, sic mulus mulum scabit.

I V. Sed quæri potest, vter rectius sentiat in hac re, Salcolbrigien[sis], qui affirmat, Regem esse Primate[m] Ecclesiæ; an Tookerus, qui negat? Hæc lis pendet ex alia quæstione, an scilicet hæc duo nomina, *Primas*, & *Primatus*, sint necessario connexa seu coniugata? Salcolbrigien[sis] putat, necessario connexa esse. Igitur, quia semel dixit, Regem habere Primatum Ecclesiæ, consequenter affirmat, Regem esse Primate[m] Ecclesiæ. Valet enim apud ipsum, hoc argumentum à coniugatis: *Rex habet Primatum. Ergo, Rex Primas est.* Sicut & istud: *Sacellanus habet Episcopatum. Ergo Episcopus est.*

V. Tookerus contra sentit. Nam pagina 6.

na 6. disertè ait, Regem habere quidem Primatum Ecclesiæ; non tamen esse Primatem Ecclesiæ. Et è contrario, Archiepiscopum Cantuariensem, non habere Primatum Ecclesiæ; sed tamen esse Primatem Ecclesiæ. Igitur negat has duas consequentias à coniugatis. I. *Rex habet Primatum: Ergo Primas est.* II. *Archiepiscopus est Primas. Ergo Primatum habet.* Fortè & has negaret. I. *Sacellanus habet Episcopatum: Ergo Episcopus est.* II. *Took rus Decanus est: Ergo Decanatum habet.*



## IV. QVÆSTIO.

*An Rex à suo Primatu possit vocari supremum  
Caput Eccle-  
siæ?*

I. **H**ic titulus primùm vsurpari cœpit ab Henrico Octavo; vt testantur passim authores, tam aduersarij, quàm nostri. Sic enim scribit Iacobus Thuanus lib. 1. historiæ. sui temporis:

*Henricus, post diuortium, se caput Ecclesiæ constituit. Et Polydorus Virgilius lib. 27. historiæ Anglicanæ: Interea, post diuortium, habetur Concilium Londini, in quo Ecclesia Anglicana formam potestatis nullis antè temporibus visam induit. Henricus enim Rex, caput ipsius Ecclesiæ constituitur. Et Genebrardus libro 4. Chronologiæ: Henricus anno 1534. in publicis Comitibus, se caput Ecclesiæ Anglicanæ appellauit. Et Nicolaus Sanderus in schismate Anglicano: Ex qua dicendi formula primam occasionem sumptam aiunt. ut Rex supremum caput Ecclesiæ Anglicanæ diceretur. Item: Proponerentur eis noua Comitiorum decreta; & iubebantur iureiurando affirmare, Regem supremum Ecclesiæ esse caput. Et Caluinius in cap. 7. Amos Prophetæ: Qui tantopere extulerunt Henricum Regem Angliæ, certè fuerunt homines inconsiderati. Dederunt enim illi summam rerum omnium potestatem; & hoc me grauitè semper vulnerauit. Erant enim blasphemæ, cum vocarent eum summum caput Ecclesiæ sub Christo.*

II. Eodem titulo vsus est Edouardus Henrici filius & successor, vt patet ex Rescripto illius ad Thomam Crammerum, archiepiscopum Cantuariensem, quod sic incipit: *Edouardus, Dei gratiâ, Angliæ, Franciæ, & Hybernæ Rex, supremum in*  
*terris*

*terris Ecclesie Anglicanae & Hybernicae, tam in causis spiritualibus, quam temporalibus, Caput, Reuerendo Thome Cantuariensi Archiepiscopo salutem. Eundem titulum tribuit illi Crammerus in Rescripto ad Episcopos sibi subiectos, ubi sic habet: Thomas, permissione diuina, Cantuariensis Archiepiscopus, per Illustrissimum in Christo Principem Edouardum Regem Sextum, supremum in terris Caput Ecclesie Anglicanae & Hybernicae, sufficienter & legitime auctorizatus, tibi Edmundo Londinensi Episcopo, & omnibus fratribus Cœpiscopis, vice & nomine Regie Maiestatis, quibus in hac parte fungimur, mandamus, ut Imagines ex Ecclesiis, cuiusq; Diœcesis tollantur. Et Nicolaus Sanderus in schismate Anglicano: Quam primum visum est, Henrici Octauī mortem diuulgare, statim Edouardus Henrici filius, nonum ætatis annum agens, Rex Angliæ proclamatur, & summum Ecclesie Anglicanae in terris Caput, proximè secundum Christum constituitur.*

III. Elisabetha, tametsi fœmina esset, non tamen putauit, inferiorem se esse Patri & fratri, in hac re. Itaque & ipsa supremum Ecclesiæ Anglicanae Caput appellata est. Sic enim de ea scribit Iacobus Thuanus libro 15. historiarum sui temporis: *Elisabetha, recepto à Patre & fratre*

*titulo, Ecclesie Caput per Angliam caput appellari.*

IV. Athoc tempore, sub Iacobo, periclitatur hic titulus. Admittit quidem illum Sacellanus in Tortura Torti ; sed Tookerus & Burhillus repudiant. Verba Tookeri, quæ paulò ante citaui, sunt hæc : *Olere autem malitiam, & clamitare audaciam tuam videtur illud, cum Reg. m. Caput Ecclesie Primatemq; confingas.* Similiter Burhillus, pagina 133. reprehendit quendam, tanquam *Petulcum & Audaculum*, quod dixisset, Regem esse *Caput, Pastorem, & Primatem Episcoporum.*

V. In hoc dissidio, quid agat Rex ? Si admittit titulum *supremi Capitis Ecclesie in Anglia*, murmurabunt Tookerus & Burhillus : si respuit, quid dicet Sacellanus ? Forte sopiri hæc lis poterit, si Rex, ut Sacellano dedit Episcopatum Eliensem, ita Tookero & Burhillis duos similes largiatur. Tunc facile, ne ingrati videantur, concedent Regi hunc titulum, & multò amplio-rem.





## V. QVÆSTIO.

*An Primatus Regis consistat  
in aliqua potestate vel iurisdictione ecclesiastica?*

I. **H**ic magnum inter Anglos dissidium est. Nec facile intelligetur, nisi præmissa distinctione. Igitur potestas Ecclesiastica triplex est, ut docent Theologi. Vna ordinis; altera iurisdictionis interioris; tertia iurisdictionis exterioris. Ad primam spectat, Sacramenta conficere & ministrare: ad secundam, regere Ecclesiam in foro conscientiarum: ad tertiam, regere eandem in foro externo. Certum est, Regem, ratione Primatus, non habere potestatem ordinis. Hoc fatetur Tookeus pag. 14. cum ait: *Reges non habent potestatem administrandi Sacramenta.* Certum quoque, non habere iurisdictionem fori conscientiarum. Et hoc fatetur, pag. 63. *Omnis, inquit, iurisdictionis in foro interiori, Sacerdotum est, nulla Regum.*

II. Tota controuersia est, an habeat Rex

jurisdictionem Ecclesiasticam in foro exteriori. Hic litigant Angli. Aliqui affirmant; alii negant; alii distinguunt. Affirmat Tookerus pag. 305. his verbis : *Qui habet plenissimam & amplissimam jurisdictionem in foro exteriori, potest eandem dare & auferre. Rex eam habet. Ergo potest eandem dare & auferre. Totum hoc liquet ex V. & N. Testamento.* Et Henricus Salcobrigiensis, pag. 140. *Reges sacro oleo uncti, capaces sunt jurisdictionis spiritualis.* Et ibidem ex Legibus Anglicanis : *Rex est persona mixta, utpote, qui & Ecclesiasticam & temporalem jurisdictionem habet. & quidem supremam.* Et pag. 144. *Per leges Ecclesiasticas in hoc regno approbatas, unus Sacerdos duo beneficia habere non potest, nec Bastardus sacris initiari. Verum Rex, Ecclesiastica potestate & iurisdictione, quam habet, in utroque dispensare potest.*

III. Negant Thomsonius & Burhillus. Et quidem Thomsonius, pag. 80. sic scribit : *Primatus Ecclesie non est definiendus per jurisdictionem Ecclesiasticam, sed per gubernationem supremam.* Et pagina 95. *Diximus Regem gubernare quidem Ecclesiastica, sed non ecclesiasticè, quia scilicet non habet jurisdictionem ecclesiasticam, sed duntaxat temporalem.* Burhillus vero, pag. 234. concedit hanc propositionem  
negati-



negativam: *Rex nullam habet iurisdictionem ecclesiasticam, nec in foro interiori, nec in exteriori.*

I V. Distinguit Episcopus Eliensis, apud Tookerum, pag. 305. his verbis: *Habet Rex omnem iurisdictionem spiritualem in foro exteriori, exceptis quibusdam censuris.* Igitur ad hanc questionem, an Rex, quatenus est Primas seu caput Ecclesiæ, habeat aliquam iurisdictionem Ecclesiasticam seu spiritualem fori exterioris, sic respondendum est. Primò, cum Tookero & Salcolbrigienti: *Habet amplissimam plenissimam, supremam.* Secundò, cum Episcopo Eliensi: *Habet aliquam, non omnem.* Tertiò, cum Burhillo & Thomsonio: *Nullam, nullam penitus habet.*



## VI. QVÆSTIO.

*An Rex propria auctoritate possit Synodos indicare?*

I. **S** Equitur dissidium de officiis Primatus Regij. Sunt autem sex officia, de quibus disputari potest.

Primum, indictio Synodorum. Secundum, sanctio legum ecclesiasticarum. Tertium, collatio beneficiorum. Quartum, creatio & depositio Episcoporum. Quintum, excōmunicatio. Sextum, controuersiarum decisio. Est ergo quæstio, an hæc officia pertineant ad Primatum Regis? Dicam de singulis ordine.

II. Primò quæritur, An Rex, ratione sui Primatus, possit propria autoritate conuocare Synodos, & in iis præsidere? Hoc certò persuasum fuit tempore Henrici, Edouardi, & Elisabethæ. Nunc, sub Iacobo, controuertitur. Affirmat Salcolbrigensis, pag. 121. his verbis: *Christiani Principes in ignis suis cum laudè, propria autoritate Synodos conuocarunt, constitutiones condiderunt, causas audierunt & cognouerunt.* Et pag. 146. *Rex Angliæ potest Synodos indicare omnium Ordinum œcumenicas, & in iisdem præsidere.* Et pag. 155. *Reges Angliæ suprema sua autoritate, de iure, Synodos conuocarunt.*

III. Tookerus in hoc puncto varius est, & nunc sibi ipsi, nunc aliis contradicit. Hoc patet ex variis eius testimoniis. Primum habetur, pag. 37. ubi sic ait: *A quibus magis æquum est indici Concilia, quàm ab illis, penes quos semper fuit autoritas ea congregandi? Cum autem communiter tri-*  
plex

plex poni soleat Concilium, Generale, Prouinciale, & Diœcesanum; Concilium generale solius Papæ iussu celebrari vultis. Sed neque illud, nisi ab Imperatoribus & Regibus simul consentientibus, hodie indici debet: Prouinciale à Metropolitano, cum suis Suffraganeis: Diœcesanum ab Episcopo cum Curatis, Rectoribus & Clericis Diœcesanos. Ex hoc testimonio colligitur, Regem Angliæ, nullum Concilium, propria authoritate, posse indicere. Non Generale, quia hoc pertinet ad communem consensum Regum & Imperatorum. Nec Prouinciale, quia hoc pertinet ad Metropolitanum. Nec Diœcesanum, quia hoc pertinet ad Episcopum. Quid ergo reliquum est Regi?

IV. Alterum habetur pag. 41. his verbis: *Abundè liquet ex Conciliis ipsis & historia Ecclesiastica, Prouincialia Concilia & Nationalia ab Imperatoribus ac Regibus fuisse congregata.* Hoc planè pugnat cum præcedente. Ibi asseritur, Concilia Prouincialia indici à Metropolitanis: hic, à Regibus & Imperatoribus. Ibi, distinguitur triplex tantum Concilium, Generale, Prouinciale, Diœcesanum: hic, additur quartum, Nationale.

V. Tertium habetur, pagina 42. ubi proponit hanc quæstionem: *Quo igitur iure*

iure iure tantam sibi potestatem arrogat Pontifex solus? Num diuino? Et paulò post subdit: *Erat Apostolorum omnium, non vnus tantummodo, & indicere Concilium, & statu re cum verborum solennitate; Visam est Spiritui sancto, & nobis.* Quasi dicat; Iure diuino, non solus Petrus, sed omnes Apostoli, pari potestate, indixerunt Concilium Hierosolymitanum, & sancuerunt legem de sanguine & suffocato: Ergo similiter, iure diuino, non solus Pontifex, sed omnes Episcopi, pari potestate, debent indicere Concilium, & sancire leges Ecclesiasticas. Sanè, si ita est, omninò sequitur, potestatem indicendi Concilia, non ad Reges & Principes sæculares; sed ad Apostolos & eorum successores, iure diuino pertinere.

VI. Quartum habetur, pag. 63. vbi ait: *Mixtum autem ius, & resultans ex utroq, & iure Regio & Episcopali, est legum sanctio, & Synodorum indictio, & presidendi in iis prerogativa, & controuersiarum decisio, aliorumq, actuum, qui his finitimi sunt, exercitium: quæ ferè ab origine Primatus Regni descendunt, & communicantur Sacerdotibus.* Hoc iterum pugnat cum præcedente. Ibi dicitur, indictionem Synodorum, iure diuino, ad Apostolos pertinere: Hic dicitur primariò pertinere ad Reges, & ab

& ab illis ad Episcopos deriuari. Hæc non  
coherent.



## VII. QVÆSTIO.

*An Rex possit leges Ecclesia-  
sticas condere?*

I. **C**onstat, Henricum Octauum,  
tum per se, tum per Vicarium  
suum generalem, id fecisse. De  
Henrico sic scribit Sanderus in Schismate  
Anglicano: *His diebus, vigilantissimus hic  
Ecclesia Pastor. Henricus, quo in posterum  
sciretur, qua cui ritè nupta esset, legem edi-  
derat perpetuam de nuptiis, Comitiorum et-  
iam auctoritate firmatam, qua statuebatur,  
ut si quæ persona in Leuitico non prohibita,  
solo consensu, per verba de presenti, matri-  
monium, nulla carnis copula subsecuta, con-  
traxerint; ea verò amba postea, vel earum  
altera, nuptiis cum altera persona in Leui-  
tico non prohibita contractis, carnali copula  
easdem consummauerint; he posteriores,  
quas firmasset copula, non priores illa, quas  
solus consensus statuisset, rata atque legiti-  
ma haberentur: adeo, ut cum olim iuris gen-  
tium*

*num fuisset regula, Nuptias non concubitus, sed consensus facit; iam d. in eps Henrici regula esse cæperit, Nuptias non consensus, sed concubitus facit. Et tamen ipse legislator, contra suam ipsius regulam, uxorem Ananiam Clunensem, cuius nuptias, non solo consensu, sed septem etiam mensium concubitu firmauerat, eo solum prætextu reiecit, ipsamq; ueniente aliam superinduxit, quod alteri, nescio cui, consensum antea præbuisse fingeretur. Huius ergo legis tantopere postea pædixit ipsos Protestantes, ut mortuo Henrico, eam ipsi renocauerint, atq; irritam fecerint.*

II. De Vicario autem generali, sic habet: *Septembri mense, autoritate sua vicaria, Canones quosdam ecclesiasticos, quos Iniunctiones vocabat, sigillo Vicariatus sui munitos, Archiepiscopis, Episcopis, Abbatibus, & reliquo Clero præscripsit, in quibus, præter cetera, iuebantur Parochi sub grauissimis pœnis, ut orationem dominicam cum salutatione Angelica, Symbolum item fidei, & decem decalogi præcepta, aliq; huiusmodi, Anglicè in posterum in Eccl. suis docerent.*

III. Angli, qui hoc tempore scribunt de Primatu Regio, non consentiunt in hoc puncto. Nam aliqui dicunt, sanctionem legum Ecclesiasticarum, iure diuino, pertinere

tinere ad Episcopos ; alij ad Reges & Imperatores. Priorem partem docet Tookerus , pagina 42. vbi ait , Apostolos in Concilio Hierosolymitano sancivisse hanc legem Ecclesiasticam : *Visum est Spiritui sancto & nobis , nihil ultra imponere vobis oneris , nisi hæc necessaria , ut abstineatis vos ab immolatis simulachrorum , & sanguine , & suffocato.* Et hoc fecisse eos iure diuino. Posteriorem docet Thomsonius , pag. 80. vbi dicit , Episcopos & Concilia non posse condere vllam legem Ecclesiasticam , quæ habeat vim legis , nisi accedente auctoritate Regis vel Imperatoris. Verba eius sunt hæc : *Decreta Conciliorum & Patrum Ecclesiasticis censuris , & emptionis tantum stetissent , nisi legum vim Cæsarea aura ipsis afflasset.*

IV. Hic jam patet dissidium. Nam illa lex Ecclesiastica , quam Apostoli condiderunt , habuit sine dubio vim legis. Hoc enim colligitur ex illis verbis : *Visum est , nihil ultra imponere vobis oneris , nisi hæc necessaria.* Hanc autem vim non habuit ab afflatu auræ Cæsareæ , quia neque Tiberius , neque Pilatus , neque Herodes , neque vllus alius Princeps secularis , qui tunc vixerit , afflauit illi vim legis ; sed habuit ab ipsis Apostolis.

Apostolis. Ipsi enim autoritate & potestate Apostolica, quam à Christo acceperant, legem illam sanxerunt & promulgarunt. Eandem potestatem nunc habent Episcopi, non Reges aut Imperatores.



# VIII. QVÆSTIO.

*An Rex propria autoritate possit conferre beneficia ecclesiastica?*

I. **A**ffirmat Henricus Salcolbrigien-  
 sis, pag. 121. his verbis: *Christiani*  
*Principes in suis regnis, cum lau-*  
*de, propria autoritate, beneficia contule-*  
*runt.* Et pag. 150. *Audin Jesuita, non modò*  
*collationes beneficiorum ad Angliæ Reges*  
*spèctare, sed ad eosdem illos spèctare, vti Ec-*  
*clesiæ Anglicanæ Primates, vel supremos Or-*  
*dinarios?* Et pag. 142. *Rex ratione supre-*  
*mæ suæ Ecclesiasticæ iurisdictionis, presenta-*  
*bit ad liberæ Capellas.*

II. Negat Tookerus, pag. 36. vbi de Re-  
 gibus Angliæ sic loquitur: *Beneficia autem*  
*curata, vel non curata, non conferunt omni-*  
 nò in



nō in quempiam, maiora minorave: multò minus dignitates ecclesiasticas. siue Episcopatus, siue Archiepiscopatus, per uniuersum ambitum regni sui. Eorum certè collatio vel institutio est, quorum est destitutio, id est, Episcoporum comprouincialium, qui potestatem habent personas ipsas sacrandi. Hoc habet iuris Regia Maiestas, quod minor & subordinata potestas habet; ius, inquam, nominandi & præsentandi apud nos.

III. En triplex dissidium inter hos duos authores, & quidem in re quotidiana & vulgari. Primum est; Henricus dicit, collationem beneficiorum spectare ad Reges Angliæ, quatenus sunt Primates Ecclesiæ Anglicanæ: Tookerus contra, non ad Reges, sed ad Episcopos pertinere. Alterum: Henricus dicit, Reges propria authoritate sæpè contulisse beneficia: Tookerus, nunquam conferre aut contulisse. Tertium; Henricus dicit, Reges; ratione supremæ iurisdictionis Ecclesiasticæ, præsentare ad beneficia: Tookerus, Reges in hac re non habere plus iuris, quàm subditos & inferiores. Hoc, inquit, iuris habet Regia maiestas, quod minor & subordinata potestas habet. Vtri credat Rex Iacobus, si pingue beneficium, aut Archiepiscopatus conferendus sit?



## IX. QVÆSTIO.

*An Rex possit Episcopos creare & deponere?*

I. **A**ffirmat Henricus Salcolbrigien-  
 sis. pag. 121. *Christiani*, inquit,  
*Principes in suis regnis, cum lau-*  
*de, propria auctoritate, Episcopos creaverunt*  
*& deposuerunt.* Et pag. 144. *Rex Angliae*  
*Archidaceno Richmundia Episcopatum*  
*concessit iurisdictionem.* Et pag. 155. *Reges*  
*Angliae, suprema sua auctoritate, de iure,*  
*atque cum laude omnium ordinum, Episco-*  
*pos elegerunt, ac proinde deponere potue-*  
*runt.* Et pag. 167. *Constat, Christianos*  
*Principes cum laude Episcopos elegisse &*  
*deposuisse, etiam Romanos.*

II. Negat Tookerus, loco citato. Ibi  
 enim duo requirit, ad constituendum seu  
 creandum Episcopum. I. Consecratio-  
 nem personæ. II. Episcopatum. Addit,  
 Regem neutrum præstare posse. Nec e-  
 nim posse conferre vlla beneficia, multò  
 minus Episcopatum aut Archiepiscopa-  
 tum: nec habere potestatem sacrandi  
 personas. Vnde etiam alibi fatetur, tan-  
 tum

tum abesse, vt Rex Iacobus possit Episcopos creare & deponere; vt potius agnoscât se illorum alumnus & Discipulus. Sic enim scribit pagina 311. *Serenissimus ac pientissimus Rex noster Iacobus non habet quicquam antiquius & honorificentius, quam vt cum Valentino filium se Ecclesie proficiatur, & cum Theodorico Italia Rege, se alumnus Ecclesie, & Discipulum Archiepiscoporum suorum & Episcoporum, libenter recognoscit.*

III. Hoc dissidium magni momenti est. Nam si Rex non potest creare seu constituere Episcopos, vt ait Tookerus; planè sequitur, Thomam Crammerum, qui à Rege creatus est Archiepiscopus Cantuariensis, non fuisse verum, sed falsum Episcopum: non Pastorem, sed prædonem: non per ostium intrasse in ouile ouium, sed aliundè ascendisse. Ex quo rursum tria sequuntur. I. Omnes alios Episcopos, qui postea, vel à Crammero, vel à Rege creati sunt, fuisse similes Crammero. II. Quidquid ab iis, autoritate & iurisdictione Episcopali factum est, nullius roboris & momenti esse. III. Eosdem teneri ad restitutionem omnium prouentuum, quos ratione Episcopatum acceperunt. Quid hic consilii capiendum? Videant Academici.



## X. QVÆSTIO.

*An Rex possit subditos contumaces excommunicare?*

I. **H**ic Angli redigunt Regem suum ad communem ordinem : Et quæ prius illi concesserant , videntur hîc reuocare. Aiunt , Regem non posse quenquam suorum subditorum excommunicare ; posse tamen ab iis excommunicari , & ex Ecclesia Anglicana , cuius supremum caput est , expelli. Priorem partem tradit Tookerus , pag. 15. his verbis : *Rex non habet potestatem distringendi gladium spiritualem , vel quempiam excommunicandi.* Et Sacellanus pag. 151. *Nos Principi censura potestatem non facimus.* Et Thomsonius , pag. 83. *Excommunicare nullo modo ad Suprematum Ecclesie pertinet.* Et pag. 84. *Omnes fatemur , Regem excommunicandi potestatem nullam habere.*

II. Posteriores tradit Burhillus , pag. 137. cùm ait : *Quod Ambrosio licuit in Theodosium , idem & aliis in Regem , simili de causa,*

*causa, liceat, id est, sicut Ambrosio Episcopo licuit excommunicare Theodosium Imperatorem, ita & nostris Episcopis licet excommunicare Iacobum Regem, si similiter peccet. Et pag. 242. Supremus Ecclesie gubernator, nempe Rex, potest eiici ex Ecclesia. Et pag. 267. Rex, et si iustissimè excommunicatus, non amittit Primatum.*

III. Non video, quomodo hæc cohæreant cum iis, quæ hætenus tributa sunt Regi. Tributum illi est, quod sit Primas, & supremū caput Ecclesiæ Anglicanæ; quod sit supra omnes personas, tam ecclesiasticas, quàm laicas, in suo regno; quod habeat supremam, amplissimam & plenissimam iurisdictionem ecclesiasticam, non minus quàm politicam & temporalem. Et tamen cum tantus sit, non potest quenquam suorum subditorum, nec laicum, nec Ecclesiasticum, quantumvis rebellem & contumacem, excommunicare? Imò, cum tantus sit, potest à suis subditis excommunicari, & eiici ex Ecclesia Anglicana, cuius supremum caput est? Non capio hoc mysterium.

IV. Addam tria argumenta, quæ augebunt difficultatem. Primum est; Qui habet supremam, amplissimam & plenissimam iurisdictionem ecclesiasticam in aliquo regno, potest exercere omnes actus,

qui pertinent ad iurisdictionem ecclesiasticam illius regni; sed Rex habet supremam, amplissimam & plenissimam iurisdictionem ecclesiasticam in regno Angliæ, vt fatentur Tookerus & Salcölbrigienfis. Ergo potest exercere omnes actus pertinentes ad iurisdictionem Ecclesiasticam regni Angliæ. Ergo etiam potest excommunicare. Nam excommunicatio, quæ per sententiam fit, ecclesiasticæ iurisdictionis actus est. Vel contra, si vis: Qui non potest exercere omnes actus ecclesiasticæ iurisdictionis in aliquo regno, non habet supremam, amplissimam & plenissimam iurisdictionem ecclesiasticam in illo regno; sed Rex Angliæ non potest exercere omnes actus ecclesiasticæ iurisdictionis in suo regno, quia non potest quenquam excommunicare. Ergo non habet supremam, amplissimam & plenissimam iurisdictionem Ecclesiasticam in suo regno.

V. Alterum est; Qui alteri dat potestatem excommunicandi, is sine dubio habet potestatem excommunicandi, quia nemo potest alteri dare, quod ipse non habet: sed Rex Angliæ dat Episcopis potestatem excommunicandi. Ergo ipse habet potestatem excommunicandi. Minor probatur ex Tookero, pagina 304. vbi fatetur, Episcopos omnem iurisdictionem

tionem Ecclesiasticam fori exterioris accipere à Rege. At potestas excommunicandi pertinet ad iurisdictionem fori exterioris, vt expressè docet Sacellanus pagina 41. & Tookerus pagina 305. cum ait: *Rex habet omnem iurisdictionem spirituales in foro exteriori, exceptis quibusdam censuris.* Excipit autem excommunicationem. Vbi iterum notanda est contradiçtio Tookeri. Nam censuras, inter quas est Excommunicatio, refert ad iurisdictionem fori exterioris. Rectè quidem. Sed duo addit, quæ pugnant. I. Regem dare Episcopis omnem iurisdictionem fori exterioris. II. Regem non habere omnem iurisdictionem fori exterioris.

VI. Tertium est; Qui alicui alteri subiectus est in iurisdictione ecclesiastica fori exterioris, non habet supremam, plenissimam, & amplissimam iurisdictionem ecclesiasticam fori exterioris, sed Rex alicui alteri, nempe Episcopo subiectus est in iurisdictione ecclesiastica fori exterioris, quia potest ab eo per sententiam excommunicari, & ex Ecclesia eiici, vt fatetur Burhillus: Ergo non habet supremam, plenissimam & amplissimam iurisdictionem ecclesiasticam fori exterioris. Vel, si mauis, contra. Qui nulli alteri subiectus est in iurisdictione

ne ecclesiastica, non potest ab ullo per sententiam excommunicari: sed Rex, si habet supremam iurisdictionem ecclesiasticam, nulli alteri subiectus est. in iurisdictione ecclesiastica: Ergo non potest ab ullo per sententiam excommunicari. Aduertis, opinor, hæc non cohærere.



XI. QVÆSTIO.

*An Rex sit iudex omnium  
controuerfiarum in Ec-  
clesia?*

- I. **C**ontrouerfiæ, quæ oriuntur in Ecclesia, sunt duplices: aliæ circa fidem & religionem; aliæ circa res alias ecclesiasticas. Est ergo prior quæstio, an Rex, ratione sui Primatus, sit supremus iudex omnium controuerfiarum, quæ pertinent ad fidem & religionem? Affirmat Henricus Salcolbrigienfis, pag. 163. his verbis: *Sic luce clarius est, Christianos Principes, cum laude, controuerfias fidei diiudicasse & diremisse, etiam in uniuersalibus octo Conciliis, id est, Niceno I. Constanti-*  
nopo-




nopolitano I. Ephesino, Chalcedonenſi, Constantinopolitano II. Constantinopolitano III. Niceno II. Constantinopolitano IV. in quibus variæ controuerſiæ fidei diiudicatæ & diremptæ ſunt ; præſertim de diuinitate Chriſti, contra Arium ; de diuinitate Spiritus ſancti, cōtra Macedonium; de vna Chriſti perſona, contra Neſtorium; de duabus in Chriſto naturis, contra Eutychen & Dioſcorum; & ſic deinceps. Has omnes controuerſias, ait Salcolbrigienſis, ab Imperatoribus & Principibus ſæcularibus diiudicatas ac diremptas eſſe.

II. Contrarium aſſerit Tookerus, qui nullo modo vult Reges aut Imperatores eſſe iudices controuerſiarū fidei. Sic enim habet pag. 3. *Olere autem malitiam ac clamare audaciam tuam illud videtur, cū Regem caput Eccleſiæ Primatēq, conſingas, omniumq, cauſarum & controuerſiarum, quæ ad fidem & religionem pertinent, Iudicem tribuas.* Et pag. 50. *Rex in ſuo regno, omnibus ſuperior ſit, nulli ſubditus: Fidei iudex ne appelletur quidem.* Et pag. 313. *Reges Chriſtiani non ſunt fidei ac religionis iudices.*

III. Igitur, ſi in Anglia oriretur diſſenſio de aliquo puncto fidei ac religionis, vt v.g. de reali præſentia Chriſti in Euchariftia; quid facerent Acadēmici? quid ciues, quid

reliqui subditi? An adirent Regem, tanquam iudicem, & ab eo sententiam peterent? Non faceret Tookerus. An alium iudicem postularent? At alium non ferret Salcolbrigienſis. Quid ergo futurum eſſet? Id planè, quod hætenus factum eſt in diſſenſione de Primatu Regio. Semper litigant Angli de hoc Primatu: nunquam finiri liſ poteſt. Quid cauſæ? quia diuerſi diuerſa ſentiunt, & certum iudicem, qui litem dirimat, reperire non poſſunt; vel potius, non volunt. Hæ hæreticorum proprietas eſt.

IV. Poſterior quæſtio; An Rex ſit iudex omnium controuerſiarum, quæ alias res Eccleſiaſticas concernunt? Affirmat Salcolbrigienſis, pag. 165. cùm ait: *Audin controuerſias Episcopales ab Imperatore diremptas?* Quid ſentiat Tookerus, non ſatis conſtat. Aliquando videtur affirmare, vt pag. 24. *Nemini, inquit, dubium eſt, quin in primitiua Eccleſia, de rebus & perſonis eccleſiaſticis, ius dicerent Imperatores.* At pag. 23. videtur negare: *Non eſt Princeps, inquit, ſupra res, ſed ſupra perſonas.* Et pag. 49. *Rex in ſuo regno ſupremus eſt, non ſupra res, ſed ſupra homines.* Vbique diſſidium.



## XII. QVÆSTIO.

*Vnde, & quo titulo; Rex habeat Primatum in Ecclesia?*


I. **S**ensus est, an Rex ex eo præcisè, quia Rex est, an ex eo potius, quia Rex Christianus est, habeat Primatum Ecclesiæ? Priorem partem videtur amplecti Thomfonius, pag. 78. cum ait: *Omnes Principes, etiam Pagani, obsecutiue habent supremam potestatem in omnes omnino personas suorum subditorum, & generatim in res ipsas, siue ciuiles sint, siue sacra, ut in cultu diuino & religione procuranda, saltem quoad modum & exercitium.* Et pag. 94. *Primatus est Regum bonum, quod censurâ tolli non potest. Nec est absurdum, Regem velut ethnicum, esse Primate[m] Ecclesiæ.* Et ibidem: *Rex ethnicus, cum CHRISTO initiatur, non acquirit Primatum de nouo.* Cui consentit Burhillus, pagina 251. *Rex, inquit, titulo Regis temporalis, potest sibi vindicare*  
*& assu-*

*& assumere Primatum Ecclesie. Et pag. 267. Rex, etsi iustissime excommunicatus, non amittit Primatum in rebus ecclesiasticis.*

II. Cōtrarium docet Sacellanus in Tortura Torti, pag. 39. ubi asserit, Primatum Ecclesiæ convenire Regi, non quia Rex, sed quia Rex Christianus est; ideoque Reges ethnicos non habere Primatum Ecclesiæ, quamdiu ethnici sunt, sed eum accipere, quando fiunt Christiani; & rursus amittere, quādo excommunicantur. Verba eius sunt hæc: *An non Regi ethnico prestare fidem fas? Imò nefas non prestare. In ethnico enim est vera potestas temporalis, idq, sine ordine ad potestatem ecclesiasticam. Et paulò post: Rex quivis, cū de ethnico Christianus fit, non perdit terrenum ius, sed acquirit ius novum. Itidem, cū de Christiano fit sicut ethnicus, vigore sententie amittit novum ius, quod acquisiverat, sed retinet terrenum ius in temporalibus, quod fuerat illi proprium, priusquam Christianus fieret.*

III. Ex sententia Thomsonii & Burhilli sequitur, omnes Reges, siue Christiani, siue Ethnici, siue cuiuscunque sectæ ac religionis sint, habere Primatum Ecclesiæ in suis regnis. Igitur, omnes Anglos & Scotos, qui vivunt Constantinopoli, subiectos esse Imperatori Turcarum in rebus Ecclesiasticis;

sticis; qui in Hispania, subiectos esse Philippo Regi; qui Romæ, Pontifici; & sic deinceps, Quid ergo facient, si Turcarum Imperator iubeat eos Alcoranum sequi; si Rex Hispaniæ, ad Missam audiendam adigat; si Pontifex ad orandum pro defunctis hortetur; si Rex gentilis ad idololatriam impellat? An parebunt imperio? At contra conscientiam facerent. An non parebunt? Sic actum est de Primatu Ecclesiæ. Dicent fortè, se parituros, ubi visum est. Ergone subditi erunt iudices suorum Regum? Ergone Catholici in Anglia poterunt vsurpare hanc vocem: *Audi Rex.* in hoc puncto visum est parere tuo imperio, in isto non est?



## XIII. QVÆSTIO.

*An Rex possit cogere suos subditos ad iuramentum Primatus?*

L. **H**Actenus actum est de dissidio Anglorum circa naturam, officia, & originem Primatus Regii. Nunc superest questio practica, quæ proximè

ximè conscientiam attingit , an scilicet Rex possit cogere suos subditos , vt sub iuramento affirment , se agnoscere Primatum Regium, de quo dictum est? Vel, se agnoscere Regem, tanquam Primatem & supremum caput Ecclesiæ Anglicanæ, cui tanquam Primati & supremo capiti velint fidelitatem polliceri, non minus in rebus ecclesiasticis & spiritualibus, quam in politicis & temporalibus. Habet autem duo puncta hæc questio. Vnum est, an Rex Angliæ de facto exigat, vel exegerit tale iuramentum à subditis? Alterum, an si exigat, subditi in conscientia teneantur illud præstare? De utroque seorsim dicam.

### PRIVS PUNCTVM.

II. Igitur prius punctum est , an Rex Angliæ exigat vel aliquando exegerit tale iuramentum à suis subditis? Constat, Henricum Octauum exegisse. Sic enim scribit Nicolaus Sanderus in Schismate Anglicano: *Laurenti ~ Cochus, Prior Cænobii Dancastrensis, unà cum tribus Monachis, & duobus Laicis, Egidio Horno, & Clemente Philpotto, quod nolent Ecclesiasticum terreni Regis Primum iuramentum confiteri, exclusi è terræ, ad celestem eterni Regis gloriam transmissi sunt.* Et iterum:

rum: Proponebantur ei nona Comitiorum decreta & iubeantur iurciurando affirmare, Regem Ecclesie supremum esse Caput.

III. Henricum imitata est Elisabetha; parentem filia. Et quidem formula iuramenti, quod exegit, est huiusmodi: Ego A. B. prorsus testificor & declaro in conscientia mea, Reginam esse solam supremam gubernatricem, & istius Regni Angliae, & aliorum omnium sue Maiestatis dominiorum & regionum, non minus in omnibus spiritualibus atque Ecclesiasticis rebus vel causis, quam temporalibus; & quod nemo exterius Princeps, persona, Praelatus, status, vel Potentatus, aut factio aut iure habet aliquam iurisdictionem, potestatem, superioritatem, praeminentiam, vel auctoritatem ecclesiasticam aut spirituales in hoc regno. fac. q. planè renuntio & repudio omnes forinsecas iurisdictiones, potestates, superioritates atque auctoritates.

IV. Idem nunc facit Iacobus Rex, qui nō vno tantum, sed duplici iuramento obstringit suos subditos: altero Primatus; altero fidelitatis. Prius sic incipit: Ego A. B. palam testor, & ex conscientia mea declaro, quod Maiestas Regia, unicuique est supremus Gubernator huius Regni, omniumq. aliorum sue Maiestatis dominiorum & territoriorum, tam in omnibus spiritualibus sine Ecclesia-  
sticis.

*sticis rebus & causis, quàm in temporalibus: Et quod nullus extraneus Princeps, persona, Prelatus, status aut Potentatus, habet aut habere debet ullam iurisdictionem, potestatem, superioritatem, præminentiam vel auctoritatem Ecclesiasticam siue spirituales intra hoc regnum &c. Posterius sic incipit: Ego A. B. verè & sincerè agnosco, profiteor, testificor, & declaro in conscientia mea, coram Deo & Mundo, quod supremus Dominus noster R. x. Iacobus &c.*

V. Hoc utrumque iuramentum integrè habetur in Apologia Regis: Et in utroque exigitur à subditis, ut palam profiteantur & agnoscant, Regem Iacobum esse supremum gubernatorem ac Dominum totius Angliæ, non solum in rebus politicis ac temporalibus, sed etiam in ecclesiasticis & spiritualibus: Et quod nec Papa, nec quis alius extraneus habeat ullam potestatem aut iurisdictionem in Ecclesia Anglicana. Porro prius iuramentum primò introductum est ab Henrico Octavo, ut fateatur Iacobus in Apologia, his verbis: *Sub Henrico Octavo primum introductum est iuramentum Primatus, sub eoq. Thomas Morus & Roffensis supplicio affecti; idq. partim ob eam causam, quod iuramentum illud recusarent. Ab eo deinceps omnes mei decessores, quotquot sunt hanc religionem*  
*complexi*



*amplexi, idem sibi, aut non multò secus asseruerunt.* Posterius à Iacobo excogitatum est.

*ALTERVM PVN-  
ctum.*

VI. Est ergo quæstio, an omnes subditi, qui in Anglia sunt, teneantur in conscientia præstare vtrumque hoc iuramentum, quotiescunque Rex illud exigit? an potius debeant carceres, tormenta, & mortem ipsam sustinere, quàm id præstent? Catholici nihil dubitant de priori. Certum fixumque illis est, vitam potius amittere cum gloriosissimis Martyribus, Thoma Moro & Episcopo Rossensi, quàm Primatum Regium astruere, & Pontificium ab iurare. De posteriori, antè paucos annos, non nihil dubitatum est. Nam aliqui ex Catholicis, quia non satis videbant vim & scopum illius iuramenti, aliquantisper hæsitaverunt, an saluâ conscientiâ iurare possent, nec ne. Quæ tamen dubitatio non diu duravit, sed confestim à Paulo V. Pontifice Maximo, & Cardinali Bellarmino sublata est. Nam Pontifex misit duo Breuia Apostolica ad Catholicos in Angliam; & Bellarminus scripsit Epistolam ad Blacuellum Archipresbyterum de hac ipsa re. Vterque negat, saluâ conscientiâ, id fieri posse.

posse. Et ratio illorum est, quia nemo, saluâ conscientiâ, potest abnegare fidem Catholicam: sed qui præstaret iuramentum à Rege propositum, abnegaret fidem Catholicam, non quidem generatim, sed tamen quoad aliquem eius articulum; Ergo nemo, saluâ conscientia, præstare potest hoc iuramentum.

VII. Hanc rationem, quæ sanè optima est, admittunt Catholici; non idem Aduersarij. Ego, in gratiam Catholicorum, qui in Anglia sunt, statui duas alias adferre, præsertim contra iuramentum Primatus, quæ ne ab aduersariis quidem repudiari poterunt. Prima est hæc; Nemo in conscientia ténetur affirmare sub iuramento, quod vel apertè falsum, vel certè dubium est: At, quod Rex sit Primas & supremum Caput Ecclesiæ, cui non solum in temporalibus, sed etiam in ecclesiasticis parendum sit, vel apertè falsum, vel certè dubium est. Ergo nemo in conscientia ténetur hoc affirmare sub iuramento. Maior per se nota est, quia ne affirmare quidem licet, quod vel falsum, vel dubium est; multò minus, sub iuramento affirmare. Minor probatur, quia tam apud Calvinistas, quàm apud Catholicos, apertè falsum censetur; quòd Rex sit Primas & supremum Caput Ecclesiæ. Apud Anglos verò,

verò, qui Regi adhærent, in dubium vocatur. Nam ex illis, alii affirmant, alii negant hæc puncta, quæ sequuntur. 1. *Rex est Primas Ecclesiæ.* 2. *Rex est supremum Caput Ecclesiæ.* 3. *Rex habet Primatum Ecclesiasticum.* 4. *Rex habet potestatem & iurisdictionem ecclesiasticam.* 5. *Rex potest propria auctoritate conuocare Synodos, & in iis presidere.* 6. *Potest conferre beneficia ecclesiastica.* 7. *Potest creare & deponere Episcopos.* 8. *Est index controuersiarum fidei.* Sanè, si hæc & similia puncta, apud ipsos Anglos, qui Regi fauēt, incerta sunt, cum ab aliis negentur, ab aliis affirmantur; totum Primatum incertum esse, necesse est. Quæ ergo temeritas & imprudentia est, obligare velle Catholicos in conscientia, vt iurati affirmant id, quod ipsi falsum, alii dubium esse censent?


VIII. Articulatius dicam, quod dixi. Iuramentum Primatus Regij continet tot partes, quot sunt, vel putantur esse officia Primatus Regij. Sunt autem, vel putantur esse varia officia, vt supra visum est, nempe, conuocare Synodos, sancire leges Ecclesiasticas, conferre beneficia, creare Episcopos, fidei controuersias dirimere. Igitur, variæ sunt partes iuramenti Primatus Regij. Ex illis, hanc vnā seorsim accipiamus: *Ego A. B. in conscientia mea iuro, me*

*fidelem & obsequentem fore Regi, quotiescunque propria auctoritate creabit Ep. suos, quos vult, & deponet ab officio, quos vult.* Si hæc pars exigatur ab omnibus, qui in Anglia sunt, quid futurum putamus? An omnes, etiam illi, qui Regi adhærent, iuraturi sunt? Faciant, qui volent; Tooke-  
rus certè, si vir constans est, facturum non est. Negat enim creationem & depositionem Episcoporum ad Regem pertinere. Et si is facturum nō est, qui aliōqui agnoscit Primatum Regium (saltem verbo) quomodo Catholici compellētur, ut faciant, qui illum penitus ignorant? Quod dixi de hac parte, de reliquis similiter dicendum est.

IX. Altera ratio est hæc: Iacobus Rex sæpè protestatur, se non plus iuris vendicare sibi in Ecclesiam, quàm olim fecerunt Reges in veteri Testamento; ac pròinde Primatum suum iisdem terminis definiri, quibus olim in veteri Testamento definebatur. Atqui Reges in veteri Testamento non poterant subditos suos cogere ad huiusmodi iuramentum: *Ego A. B. palam testor, & ex conscientia mea declaro, quòd Ieroboam est unusquisque supremus Gubernator huius regni Israelitici, tam in spiritualibus, quàm in temporalibus: Et quod nullus extraneus habet aut habere debet ullam iuris-*  
dictio-

*ditionem, potestatem, superioritatem, pre-  
minentiam, vel auctoritatem in hoc regno.*  
Ergo nec Iacobus Rex potest cogere sub-  
ditos suos ad simile iuramentum. Maior  
patet ex Apologia Regis. Minorem sic de-  
claro. Post mortem Salamonis, regnum in  
duas partes, Deo disponente, diuisum est:  
quarum altera decem tribus, altera duas  
complectebatur. Igitur duo deincepserāt  
regna distincta; duo Reges, quorum alter  
ab altero non pendeat in regimine tem-  
porali. Alter vocabatur Rex Israel; alter  
Rex Iuda. Vterque habebat suos succes-  
sores. Primi, post diuisionem factam, fue-  
runt Ieroboam Rex Israel, & Roboam  
Rex Iuda. In vtroque regno erant Leuitæ  
& Sacerdotes. At summus Pontifex non  
poterat simul in vtroque commorari, sed  
in altero tantum, ac potissimum in regno  
Iuda. Nihilominus præerat omnibus Le-  
uitis ac Sacerdotibus, qui in vtroque re-  
gno versabantur. Nec Ieroboam poterat  
legitimè dicere suis Leuitis ac Sacerdoti-  
bus: *Nolite obtemperare summo Pontifici,  
qui habitat in regno Iuda; mihi soli obedite;  
ab illius iurisdictione & potestate exempti  
estis.* Et si dixisset, sine dubio peccasset. Si  
ergo Ieroboam Rex non potuit Leuitas &  
Sacerdotes sui regni eximere à iurisdic-  
tione & potestate extranei Pontificis; quo

iure id facit Iacobus Rex Angliæ? præsertim cum asserat, se non plus iuris vindicare sibi in Ecclesiam, quàm Reges veteris Testamenti sibi vendicârunt.



## EPILOGVS.

I. **Q**Uæ hætenus dicta sunt, ad tria capita possunt reuocari. Primum est, Primatum Regis in Ecclesia, rem esse nouam, quæ ab Henrico Octauo primum introducta est, nec alibi hætenus, quàm in regno Angliæ usurpata. Alterum, tot esse dissensiones Anglorum circa hunc Primatum, vt, quid sit, & quam vim habeat, certò inter ipsos constare non possit. Tertium, iuramentum huius Primatus, nec exigi à Rege, nec à subditis præstari posse.

II. Hinc aliæ tres quæstiones, quæ circa subditos moueri poterant, facile dissoluentur. Sunt enim tria subditorum generain Anglia. I. Henriciani, (vt aliqui eos vocant) qui & agnoscunt, & iurant Primatum Regium. II. Puritani, seu puri Calvinistæ, qui non quidem agnoscunt, sed

sed tamen iurant. III. Catholici, qui nec agnoscunt, nec iurant.

III. Est ergo prima quæstio, quid dicendum sit de Henricianis, qui & agnoscunt, & iurant Primatum Regis? Respondeo. Illi stultè & inconsideratè agunt. Ratio est, quia, ut supra dixi, stultum ac temerarium est, rem dubiam & incertam iuramento confirmare. At Primatus Regis, res planè dubia & incerta est apud Henricianos, ut patet ex illorum dissidiis, quæ hætenus explicata sunt. Ergo eiusmodi Primatum iuramento confirmare, stultum ac temerarium est.

IV. Altera quæstio, quid dicendum de Puritanis seu puris Calvinistis, qui quidem non agnoscunt Primatum Regis, sed tamen, si iubeantur, iurant? Respondeo. Sunt periuri & politici. Ratio est, quia aliud sentiunt, aliud iuramento affirmant. Sentiunt cum Caluino, Reges & Principes sæculares non habere Primatum in rebus spiritualibus & Ecclesiasticis, sed solum in temporalibus; & tamen cum Henricianis, Regi tanquam Primati & supremo Capiti Ecclesiæ Anglicanæ, sub iuramento fidelitatem promittunt, Hoc autem faciunt ad externam pacem & politiam conseruandam, quæ pluris ab illis,  
D      quàm

quàm fides & religio æstimatur; ideoque politici potius, quàm Christiani appellandi sunt. De quibus verè dixit Iacobus Rex, se plus fidei in efferis latronibus, quàm in isto hominum genere reperisse.

V. Tertia quæstio, quid dicendum de Catholicis, qui nec agnoscunt Primatum Regis, nec iuramento confirmant? Respondeo: Sunt hominēs recti, qui coram Deo ambulant in veritate: simplices, qui, quod corde sentiunt, ore profitentur: cordati, qui cum Eleazaro mori malint, quàm vel externo signo in rem illicitam consentire: similes Apostolis, qui Deo magis, quàm hominibus obedire satagunt: similes Martyribus Ecclesiæ primitivæ, qui liberè coram persecutoribus profitentur, se esse, quod sunt.

VI. At miseri sunt, inquires, Si enim recusent iuramentum, coguntur subire carceres, tormenta, supplicia. Sanè, non idèò miseri, sed beati. Sic enim docuit nos Christus in Euangelio, Matth. 5. 10. *Beati, qui persecutionem patiuntur propter iustitiam, quoniam ipsorum est regnum cælorum.* At durum est, pati. Quomodo durum, quod cum gaudio & delectatione fit? Audi, quid de Apostolis dictum sit, Actor. 5. 41. *Ibant gaudentes à conspectu Concilii, quoniam digni habiti sunt pro nomine*



*mine Jesu contumeliam pati. Audi, quid Apostolus de seipso dicat, 2. Corinth. 4. Superabundo gaudio in omni tribulatione nostra.*

VII. Vnde hoc gaudium? Ex duplici dono Spiritus sancti, ipse & charitate. Spes futurae gloriae facit nos laetos & erectos in aduersitatibus. Roman. 8. 18. *Non sunt condigne passionis huius temporis ad futuram gloriam, quae reuelabitur in nobis.* Et Roman. 12. 12. *Spe gaudentes, in tribulatione patientes.* Et Hebraeor. 10. 34. *Rapinam bonorum vestrorum cum gaudio suscepistis, cognoscentes, vos habere meliorem & manentem substantiam.* Nolite itaque amittere confidentiam vestram, quae magnam habet remunerationem. Patientia enim vobis necessaria est, ut voluntatem Dei facientes reportetis promissionem.

VIII. Nec minor vis charitatis. Rom. 8. 35. *Quis nos separabit à charitate Christi? tribulatio? an angustia? an fames? an nuditudo? an periculum? an persecutio? an gladius? Sed in his omnibus superamus propter eum, qui dilexit nos.* Certus sum enim, quia neque mors, neque vita, neque Angeli, neque Principatus, neque virtutes, neque instantia, neque futura, neque fortitudo, neque altitudo, neque profundum, neque creatura alia poterit nos separare à

*charitate Dei, qua est in Christo Jesu Domino nostro.*

IX. Accedunt exempla Christi & aliorum Sanctorum, quæ etiam magnam vim habent ad excitandos & corroborandos Catholicorum animos, ut libenter patiantur in hac vita carceres, vincula, tormenta, mortem ipsam. 1. Pet. 2. 20. *Si benè facientes, patienter sustinetis; hæc est gratia apud Deum.* In hoc enim vocati estis: quia & Christus passus est pro nobis, vobis relinquens exemplum, ut sequamini vestigia eius: qui peccatum non fecit, nec inuentus est dolus in ore eius: qui cum malediceretur, non maledicebat: cum pateretur, non comminabatur: tradebat autem indicanti se in iustæ.

X. Et Hebræor. 11. 36. *Alii ludibria & verbera experti, insuper & vincula & carceres: lapidati sunt, secti sunt, tentati sunt, in occisione gladii mortui sunt: circumierunt in pelotis, in pellibus caprinis, egentes, angustiiati, afflicti: quibus dignus non erat mundus: in solitudinibus errantes, in montibus & speluncis, & in cavernis terre.*

XI. Et iterum cap. 12. 1. *Ideoque & nos per patientiam curramus ad propositum nobis certamen, aspicientes in authorem fidei, & con-*


Et consummatorem Iesum, qui proposito sibi gaudio, sustinuit crucem, confusione contempta, atque in dextra sedis DEI sedet. Recogitate enim eum, qui talem sustinuit à peccatoribus aduersum semetipsum contradictionem, ut ne fatigemini, animis vestris deficientes. Nondum enim usque ad sanguinem restitistis.

XII. Et 2. Corinth. 11. 23. In laboribus plurimis, in carceribus abundantius, in plagis supra modum, in mortibus frequenter. A Iudais quinquies, quadragenas unâ minis accepi. Ter virgis cesus sum, semel lapidatus sum, ter naufragium feci, nocte & die in profundo maris fui, in itineribus sæpè, periculis fluminum, periculis latronum, periculis ex genere, periculis ex gentibus, periculis in ciuitate, periculis in solitudine, periculis in mari, periculis in falsis fratribus: in labore & ærumna, in vigiliis multis, in fame & siti, in ieiuniis multis, in frigore & nuditate.

XIII. Et rursum cap. 12. 9. Libenter gloriabor in infirmitatibus meis, ut inhabitet in me virtus Christi. Propter quod placeo mihi in infirmitatibus meis, in contumeliis, in necessitatibus, in persecutionibus, in angustiis pro Christo. Cum enim infirmior, tum potens sum.

XIV. His

XIV. His & similibus sacrarum literarum testimoniis muniti fuerunt Thomas Morus & Episcopus Roffensis, quando potius mortem oppetere, quàm impio iuramento se obstringere voluerunt: His alii, qui eos in glorioso certamine secuti sunt: His denique, qui nunc in Anglia carceres occupant, catenis alligantur, possessionibus exuuntur, suo sanguine purpurantur.



SANCTVS CYPRIANVS

Epistola 9.

*Pretiosa mors hæc est, qua  
emit immortalitatem precio  
sanguinis sui.*

Et in fine Epistolæ.

*O beatam Ecclesiam no-  
stram, quam temporibus no-  
stris*

*stris gloriosus Martyrum  
sanguis illustrat. Erat antea  
in operibus fratrum candida:  
nunc facta est in Martyrum  
cruore purpurea.*

Et Epistola 24.

*Quid gloriosius aut fæli-  
cius ulli hominum poterit ex  
diuina dignatione continge-  
re, quàm inter ipsos carnifices  
interritum confiteri Domi-  
num Deum? quàm inter se-  
uientia secularis potestatis  
tormenta, etiam extorto, &  
excruciato, & excarnificato  
corpore, Christum Dei filium,  
etsi recedente, sed tamen libero  
spiritu confiteri? quàm relicto  
mundo*

*mundo cælum petisse? quàm  
desertis hominibus, inter An-  
gelos stare? quàm collegam  
passionis cum Christo, in  
Christi nomine fa-  
ctum es-  
se?*

FINIS.

